

Yu Xa'aqxt'iyunu' Karta yu Ts'oqnil Pablo ni Timoteo

Ni Pablo mastak'ay yu Timoteo

1 ¹ Yu kit'in kPablo, ixtamalaqachan Jesucristo kunita va por chuncha naul ni Dios. Va ixnajunta kalaqxtaqniya' jatsukunti ni lapanakni yu ch'antaun tajunita kun Cristo Jesús. ² Aniy ikts'oqniyan uxint'i, Timoteo, va k'achaniyan tacha kes'at'a k'at'i. Kamapaynin y kapaxkan y oxamaktaun kamakan kimPayk'an Dios kun Cristo Jesús kiJalhachimo'onuk'an.

³ Por uxint'i ikxtaqniy lhimalaqqu-chuncha ni Dios. Va yucha iktapatsaniy vachu va tacha ixtapatsaniy yu maqaniya' kepayank'an. Ox ijk'atsan por ni kilhitapatsa yu ikmakay. Va si ikpastak'an ni uxint'i tejkan iksk'in Dios ts'is tunkuj.

⁴ Ikpastak'a tejkan ikmakajun ni uxint'i, va ixt'a'un qalhun. Xlhiyucha ayaj klaq'u-xanchoqoyan para lay kaklhi'achantajul. ⁵ Va ikpastakchoqoy ni ox lhak'ap'up'in, tacha p'unaj lhakapu'al yu mint'aku Loida ali minati Eunice. Ox ijk'atsay ni uxint'i vachu va chun lhak'ap'up'in.

⁶ Xlhiyucha ikxtaqniyan taun jatapastak'ati, va ijkunan ni ox kamak'at'i ni lhitapatsa yu Dios lhilak'ulayan. Yucha xtaqni tejkan ikmoqslanin kimaka'. ⁷ Ni Dios kintaxtaqni ix'Espíritu, jantu para katalhanau, va para kintaxtaqni tap'asta y para kapaxkanau y para ox kalhistakvicha ketsukuntik'an. ⁸ Xlhiyucha jantu maqsk'inny k'alhimaxan ni chivinti yu lhichiviniy kiJalhachimo'onuk'an. Vachu jantu k'alhimaxan por kit'in yu klhich'i-kanta por yucha. Mas va lhita'ay kaval, iknajun k'int'at'ap'ats'at'i la ixlaqqute'eka ni ox chivinti kun yu tap'asta yu xta'a ni Dios. ⁹ Yucha kintamalaqtaxtun y kintajunta'itan para ox kati'ukxuntayau tacha ixlapanakni. Chuncha kintamakan jantu por kilhitapatsak'an, va por chuncha makaputul tejkan jantuka'

aqtaynil ni lakamunukpa'. Chuncha kintamapayniyan por yu makal Cristo Jesús. ¹⁰ Ni anchanu jamapayninti tasul tejkan kilachil kiJamalaqtaxtunuk'an Jesucristo. Yucha mami'onil ixtap'asta ni lhinin y mapulkunil ni sast'i jatsukunti yu jantu aqtaun kami'oya'. Yucha va ni jatsukunti yu lhitsukukan por ixqasmakka ni ox chivinti.

¹¹ Va por ixlaqqute'eka ni anchanu chivinti ni kit'in klhilak'ulakal y ikmalaqachakal para kaklakmalanil lapanakni yu jantu israelitas kataval. ¹² Va xlhiyucha chavaycha klhimaqanlqajnan, pero jantu klhimaxanan. Va ikmispay yu klhakapu'an y ijk'atsay ni yucha lay ox lhistik'a ketsukunti yu ikmaqxtaqnita tus kachil anchanu julchan.

¹³ Kat'aylhip'i jamalanini' yu laqsaval, tacha kit'in kunan. K'amalanin kun jalhakapu'ati ali japaxkanti yu minchal kun Cristo Jesús. ¹⁴ Ox k'alhist'akt'i ni lhita-patsa yu maqxt'aqnik'a kun ix'aqtayjunti ni Espiritu Santo yu alin kun kijnan.

¹⁵ Uxint'i k'ats'aycha ni kintamakajun ni Figelo y Hermógenes kun tachun yu alati kint'altanan yu machaqan Asia.

¹⁶ Va kamapaynil ni Jalhachimo'onu Dios ixlapanakni ni Onesíforo. Yucha aqlhuva kima'ayajnil y jantu ixlhimaxanan por ikch'ikanta. ¹⁷ Tejkan ixvil aniy laka putaulan Roma, va laqatap'asta kilakxkaul tus kintemal. ¹⁸ Kamapaynil ni Onesíforo ni Jalhachimo'onu' ni anchanu julchan. Uxint'i ox k'ats'ay ni ayaj ox tapatsal ancha laka putaulan Éfeso.

K'at'ap'asnit'i kun ixjamapayninti ni Cristo Jesús

2 ¹ Chavay ni uxint'i, kes'at'a k'at'i, k'at'ap'asnit'i kun ixjamapayninti ni Cristo Jesús. ² Ni chivinti yu asmakt'i vachu' taqasmaklhi alati tejkan kit'in

kunin, va yucha kamalanich'o'o alati yu laqsaval katataylha'al. Ex yu'uncha vachu lay katamalanichoqol alati lapanakni.

³ Uxint'i kat'ayanin mimaqanlqajnati tacha yu ox ixtropa Cristo Jesús. ⁴ Jantu matichun ox tropa kapastakchoqol para kamakal ataub lhitapatsa yu tacha tamakay yu vali'iy lapanakni. Va makaputun ixlhitapatsa tacha yu kalhipa'inil ix'ukxtin yu xtaqnita ixputropa. ⁵ Vachu qayntaun yu qamanan laqa qamanti jantu lay lhajay incha jantu vas qamanan.

⁶ Vachu yu p'ays tapatsay laka kuxtu, va yucha paxtoqniy p'unaj kalaqa'il yu jaxqanti. ⁷ Kap'ast'akt'i yu tacha kunan, ex ni Dios kaxtaqniyan tachun jatapastak'ati yu maqsk'ininy.

⁸ Kap'ast'akt'i ni Jesucristo yu ixpantanti David ixjunita, yucha va kujchoqol tejkax ixnita. Chuncha najun ni ox chivinti yu klapute'ey ⁹ y va yucha klhimaqanlqajnan. Va tus ikhlich'ikanta tacha qayntaun maqtaqalhini lapanaki kakval pero ixchivinti Dios jantu tach'in kaval. ¹⁰ Xlhiyucha ox iktayani'ojoy por ixlapanakni Dios yu jalaksakta. Ex ni Cristo Jesús vachu kajamalaqtaxtuya' para lay ox katasukul mas va tavanancha.

¹¹ Ni inchine ayaj laqsaval:

Incha t'anitaucha ni yucha ex vachu kat'ati'ukxuntayayau.

¹² Incha t'amaqanlqajnanau ex vachu kat'alhachimo'onunau.

Incha naunau jantu mispayau, ex yucha kanauna' jantu kintamispayan.

¹³ Mas jantu ox taylha'anau la kilhakapu'atk'an pero yucha va tacha oxicha taylha'an.

Dios jantu aqtaun tasp'ikchoqoy.

K'amak'at'i laqatap'asta para jantu k'alhimaxan milhitapatsa

¹⁴ Kalakmap'ast'aknich'o'o ni lapanakni y la ixlaka'ukxpu ni Dios, va kala-k'un laqatap'asta ni jantu katalalhilakatsa-k'amal por ixchivintik'an. Yucha jantu tu'uchun xtapal kaval, xajachal vamun para katalakt'ilhil ixhakapu'atk'an yu taqasmat'a. ¹⁵ K'amak'at'i laqatap'asta

para ox kalaqts'in ni Dios, tacha qayntaun tapatsan yu jantu lhimaxanan ixlhitapatsa, yu ox masuy ixchivinti Dios yu laqsaval. ¹⁶ Kamak'aunt'ijlacha axtoqnu chivinti yu jantu laqsaval kaval. Yu chuncha tachiviniy apalay talhitanuy talaqalhin. ¹⁷ Va tacha taun ts'its'i yu laqpu'ay'an va chuncha lhixajachal ixchivintik'an. Va chuncha tamakay ni Himeneo ali Fileto.

¹⁸ Yu'uncha va tamakauntijlal yu laqsaval. Tanajun tapasatacha ni julchan tejkax takujchoqoy ni janinin. Xlhiyucha tamamakauntijlay ixlhakapu'atk'an lati lapanakni. ¹⁹ Ixchivinti Dios va tacha xaputayan chaqa' yu p'ays tayay ta'an inchine ts'oqkanta: "Ni Jalhachimo'onu jalakmispay yu ixlapanakni." Vachu najun: "Tachun yu tanajun ixJalhachimo'onu' ni Jesucristo, yu'uncha maqsk'ininy katamakaun'ol tachun jalaktu'unti."

²⁰ Aqataun chaqa' yu ay, ancha jantu vamun alin puvay yu jamakanti oro ali plata. Vachu alin puvay yu jamakanti k'iu ali t'un. Lati vamun mapatsakan tejkax makakan yu ox lakvayti, yu alati va lhilhiy mapatsakan. ²¹ Incha matichun yu xaka'ojotacha ixtalaqalhin, yucha lhixajachal tacha yu ox puvaynkan, yu tumpaj ma'akanta por ix'oxixtu para kamapatsal ix'ukxtin. Yucha listujcha para lay kalhimapatsal mas va tisuncha laj'oxi lhitaapatsa.

²² K'amak'aunt'ijlacha yu talaqalhin yu tamakaputun yu ts'alanka'. Vas k'at'i'ukxunt'ay, ox k'alhak'ap'up'i, ox k'ap'axk'an. Va oxamaktaun k'ats'uk'u kun tachun yu ox tajunita la ixjalhanut-k'an yu ay tamakay ni Jalhachimo'onu'. ²³ Jantu kamak'at'i kuenta yu lakchivinti yu jantu kalhitsukul jatapastak'ati yu jantu xtapal kaval. Uxint'i k'ats'ay ni lhixajachal lhilukuj. ²⁴ Yu ix'oqxtamati ni Jalhachimo'onu', yucha jantu maqsk'ininy kamakal lhilukuj. Va maqsk'ininy qal'ox kaval kun tachun ni lapanakni y maqsk'ininy lay ox kamalanil kun maqantaulati. ²⁵ Maqsk'ininy kalakmalanil laka laksniy ni lapanakni yu

talaktanchay yu ox chivinti. Ka va lay ni Dios kamakaya' para katamapaxal ixjata-pastak'atk'an y para katamispal yu laqsaval. ²⁶ Ex chuncha lay katapuqoslhi la isqapa ni aqmoqxnu' ta'an ixjalach'i'ulata para katamakal yu yucha najun.

Tacha katajuna' ni lapanakni tejkán va laycha kaminchoqol ni Cristo

3 ¹ Vachu maqsk'inii kak'ats'at'i ni tejkán xaputamaktanacha kuna', ex la lhita'ay kuna'. ² Ka'alina' lapanakni yu vamun ix'amank'an kajapaxkakana', vamun tumin kata'achaniya', laj'ay kalakmakakana', laj'ay katak'atsana', katalak-tu'ununa', jantu kataqalasmata' ixpayan-k'an, jantu katalhipaxkalaqts'ina' yu laj'oxi, va si katamaqtaqalhinina'. ³ Jantu katamapayninina', katalaxkayya', katakitayanana', jantu lay katalakataula', katamamaqanlqajnivaya' yu alati, kataxkayya' yu laj'oxi. ⁴ Kata'akch'intamaya' ix'amigosk'an, jantu katamakaya' kuenta ixlaqtaqalk'an, laj'ay katak'atsana', vamun kata'achaniya' yu axtoqnu' yu tamakaputun, jantu yu Dios. ⁵ Katatasuya' tacha kato'oyal ni Dios pero katalaktanchaya' ixtap'asta. Lapanakni yu chuncha tajunita, k'alakmak'aucha.

⁶ Vamun tamakay kuenta katatanul laqa chaqan para katamakanul xanatin yu jantu katalhitsukul tap'asta para katanaul ni jantu. Ni anchanu xanatin jantu ox tak'atsan por ixtalaqalhint'an pero va ayaj tamaqamay katamakal pulhuu talaqalhin. ⁷ Mas va tavanancha, si talanii axtoqnu' pero jantu aqtaun lay tamispay yu laqsaval. ⁸ Ni anchanu xapaynin, yu'uncha vachu va tacha Jannes y Jambres yu ta'akch'intamal ni Moisés. Va ta'akch'intamay yu laqsaval. Jantu vas kaval ixjatapastak'atk'an y jantu laqsaval kaval ixlhakapu'atk'an. ⁹ Pero jantu tu'uchun katamakaya', va katamispaya' tachun ni lapanakni ixlhitontojk'an vachu va tacha tapasal kun Jannes ali Jambres.

Ni chivinti yu Pablo lhijuniy Timoteo

¹⁰ Pero uxint'i ox k'imisp'aniy ni kit'in tacha ikmalaninin y tacha ikmasuy ni

putsuku y yu ikmakaputun. Vachu k'imisp'aniy kilhakapu'ati ali kimaqan-aulati ali kejapaxkanti vachu' tacha ox iktayaniy yu lhita'ay. ¹¹ Vachu misp'ay tacha ixkintamamaqanlqajnivay y tacha ikmajk'atsay y vachu yu tacha klhita-pasal laka Antiokía ali Ikonio kun Listra, tachun anchanu maqanlqajnati, pero ni Jalhachimo'onu Dios kimalaqtaxtul. ¹² Vachu tachun ni lapanakni yu tato'o-yaputun Dios la ixjatsukuntik'an ch'an-taun kun Cristo Jesús, yu'uncha katamajk'atsaya'. ¹³ Yu jalaktu'unun lapanakni yu tamakanunun, yu'uncha apalay katatap'asniya' makanan yu jantu ox, katataylhaana' jamakanunun y vachu' kalakmakanukana'.

¹⁴ Pero uxint'i ox k'at'aylhip'i kun yu lanit'acha. Misp'aycha ta'ayucha masunin, xlihiyucha k'ats'ay ni va laqsaval. ¹⁵ Tus tejkán lakat'uniyika' ix'unit'a uxint'i misp'at'icha tacha ts'oqkanta la ixchivinti Dios. Ixchivinti lay malakpastakniyan para k'ap'ulaqt'axt'u por kalhak'ap'up'i ni Cristo Jesús. ¹⁶ Tachun yu ancha ts'oqkanta va minchal kun Dios y aqtayjuyan para lay k'alakmalanin y para k'alakmak'ats'anit'i ixlaqtaqalk'an y para kaxa'alat'i tejkán jantu ox tamakay y para k'alakmasunin tacha ox katijuntay. ¹⁷ Ex chuncha jantu kats'anqanil tu'uchun ni ixlapanaki Dios, va kalhitsukul tachun yu maqsk'iniiy para lay kamakal tachun yu laj'oxi.

4 ¹ Ni Jesucristo kaminchoqoya' tacha Jalhachimo'onu' para kapu-xkaulaqt's'il ni janinin ali yu jakujnun. Chavay la ixlhaka'ukxpu' kimPay Diosk'an ali Jesucristo klhijunan kama-k'at'i ni inchine. ² Kalaqp'ut'e'e ixchivinti Dios y kat'aylhip'i mas kaxt'aqnik'a lakatin o jantu. Kalach'ivivat'i ni lapanakni, k'alakmak'ats'anit'i ixlaqtaqalk'an, va kun maqantaulati k'alaqxt'aqnin ox jatapastak'ati tejkán jalakmalaniy. ³ Kamina' julchan tejkán ni lapanakni jantucha kataqasmakputuna' yu laqsaval yu masuyau. Katalakxkauya' lapanakni yu lay katamasul vamun yu

kataqasmakputuna'. ⁴ Katamakauntijlaya' ni chivinti yu laqsaval yu taqasmaktacha. Katalaqa'iy'a' tachun chivinti yu jantu laqsaval kaval. ⁵ Pero uxint'i k'alhist'ak'alhik'a me'eman kun ox jatapastak'ati. K'ama'ant'aqnin jamaqanlqajnati, kat'ayhip'i laqpute'enin ni ox chivinti, k'ama-k'a'o ni lhitapatsa yu maqxt'aqnik'a.

⁶ Chavaycha ni kit'in va ikmaqxtaqkantacha tacha taun lapaxkan. Va laka-mintacha ni julchan tejkán kakniya'. ⁷ Ox ikmajkani'ol yu ikkimpaxtoqniy lakalhilukuj, va ikmajkanil kintakyauti y jantu kaks'anqal, jantu kakmakauntijlal kilhaka-puti. ⁸ Chavaycha ikma'anikanta kilhilhajati por ox xakti'ukxuntayay. Ni Jalhachimo'onu Jesús yu si ox makay, va yucha kixtaqniya' ni anchanu julchan tejkán kapuxkaulaqs'ina'. Jantu vamun kixtaqniya' ni kit'in, va kalaqxtaqniya' ixlilhatik'an tachun ni lapanakni yu kun achati tapaxkan'ita para kaminchoqol.

Ni Pablo sk'ininy aqtayjunti ni Timoteo

⁹ K'amak'at'i laqatap'asta para niman k'ilaqt'at'i. ¹⁰ Va kimakauntijlal ni Demas, va ayaj ix'achaniy xa'axtoqnu' aniy lakamunukpa' y va antacha laka putaulan Tesalónica. Vachu' ni Crescente antacha Galacia. Vachu' ni Tito antacha Dalmacia. ¹¹ Vamun Lucas kint'avil. Kapiti ini' ni Marcos y k'ilhit'aniye'e. Yucha lay ki'aq-tayjuya' la kilhitapatsa. ¹² Chavay ikmalaqachal Tíkiko laka putaulan Éfeso. ¹³ Tejkán uxint'i k'at'ant'achiy kalhit'ane'e ni kinkutun yu ancha ikmakaumal la ixchaqa' Karpo laka putaulan Troas. Vachu' k'alhit'a ni libros y apalay maqsk'ininy k'alhit'a yu kijalhikixna.

¹⁴ Ni Alejandro yu tapatsay kun tsasnati va ayaj kimaqanchapul. Ni kiJalhachimo'onuk'an kamapalniya' por yu kimakanil. ¹⁵ Uxint'i vachu' k'alhist'ajk'a kun yucha, va ayaj kintalhilts'ak'astukni kinchivintik'an.

¹⁶ Tejkán p'unaj k'aqanixtukal laka juez jantu matichun ki'aqtayjul, tachun kintamakauntijla'ol. Va jantu kalakmakanil kuenta ni Dios por yu tamakal. ¹⁷ Pero ni Jalhachimo'onu' Jesús ix'alinta kun kit'in y kixtaqnil tap'asta para lay kaklaqpute'e'ol ni ox chivinti y para kataqasmak'ol tachun yu jantu israelitas kataval. Va chuncha va tacha kimalaqtaxtul la ixkilna ni maqtali'. ¹⁸ Ni Jalhachimo'onu Jesús kimalaqtaxtuya' va tichichuncha laqtaqal kintamakaniputul. Va kima'aya' para kaksukuchal ta'an jalhachimo'onun lakt'iyán. Vamun yu' ay kamakakal mas va tavanancha kaval, jantu aqtaun katamaktal. Va chuncha kavalcha.

Ni Pablo lakmastak'ay yu ancha tavilanal

¹⁹ K'amast'ak'at'i Prisca ali Akila ali yu tavilanal la ixchaqa' Onesiforo. ²⁰ Erasto tamakaul laka putaulan Corinto. Ni Trófimo yucha ikmakaul taqan'an laka putaulan Mileto. ²¹ K'amak'at'i laqatap'asta para k'at'at'i tejkán jantuka' lhik'asniy jun. Tamastak'ayan Eubulo ali Pudente ali Lino ali Claudia y tachun yu ket'alaqaunink'an. ²² Ni Jalhachimo'onu Jesucristo ka'alil la metsukunti. Vachu' ni Dios katamaynin mintachunk'an. Chuncha kavalcha.

Ni Chivinti yu Ts'oqnil Pablo ni Tito

Ni Pablo mastak'ay yu Tito

1 ¹ Kit'in kPablo, va ix'oqxatamati Dios kunita. Ni Dios jalaksakta ixlapanakni y Jesucristo kimalaqachata para kaklaqpute'enil y katalhakapu'al. Ex lay katamispal tas maqsk'iniy katati'ukxuntayal kun Dios. ² Tapakxan'iy ni jatsukunti y jantu aqtaun kami'oya'. La maqancha tejkan jantuka' aqtaynil ni lakamunukpa' ni Dios naul kaxta'a' ni anchanu' jatsukunti. Yucha jantu makanunun. ³ Ni Dios masul ixchivinti tejkan ox val para katasul. Va masul por ixaqpute'eka, yucha ni lhitapatsa yu kixtaqnil Dios yu kiJamalaqtaxtunuk'an.

⁴ Va ikmastak'ayan uxint'i, Tito, va tacha laqsaval kints'al k'at'i va por ch'an-taun kilhakapu'atk'an. Ni kimPay Diosk'an kun Jesucristo yu kiJamalaqtaxtunuk'an kaxtaqnin jamapayninti y oxamaktaun kamakan.

Ni Tito junkan yu ts'anqay kamakal laka Kreta

⁵ Va ikmakauncha'an ancha Kreta para kala'oxit'i yu ts'anqay y para kala-k'ulat'i xalaj'aynin yu talhakapu'an taun taun japutaulan tacha klhijunin. ⁶ Qayntaun lapanaki para kalak'ulakal tacha xa'ay jalhakapu'anan maqsk'iniy ox kati'ukxuntayal. Jantu lay kamuk'anikal laqtaqal, vamun qayntaun xanati kat'atsukul. Yu sas'at'an vachu' maqsk'iniy katalhakapu'al, jantu kalakmispakal tacha jalaktu'unun. Ox taqalasmaknan yu laklhijunkan. ⁷ Qayntaun lapanaki yu ulakan tacha xajalhistakna' yu talhakapu'an, yucha va xtaqnikan ixlhitapatsa Dios. Xlhiyucha maqsk'iniy ox kati'ukxuntayal. Jantu lay kamuk'anikal laqtaqal, jantu lay ay k'atsan, jantu lay akxauna' jo'ati kaval, jantu kata'ap'al,

jantu kalakasamanal, jantu kamakanusk'il tumin. ⁸ Maqsk'iniy kaval qayntaun yu ox jalaqa'iy lapanakni la ixchaqa'. Vachu' kun achati makay yu laj'oxi, vachu' lhistakkan ixjatapastak'ati, ox ukxuyal, makay yu lhipa'iniy Dios, ox lhistakkan ixputsuku. ⁹ Maqsk'iniy katay-lha'al kun ni chivinti yu lhakapu'ankan vachu va tacha malanikantacha. Chuncha lay kalakmalanil yu alati kun ni chivinti yu laqsaval. Vachu maqsk'iniy lay kalaqxaqalal ni lapanakni yu talaktanchay ni ox chivinti.

¹⁰ La alin yu jantu tato'oyay yu xalaj'aynin. Yu'uncha va ayaj chivin'oj lapanakni yu tamakanununputun. La alin israelitas yu chuncha talay. ¹¹ Yu'uncha jalakt'ilhiniy ixjatapastak'atk'an lapanakni yu aqataun chaqa' tavalanal. Chuncha talay por yu chivinti yu jamalaninin por tamakanulhajaputun tumin. Xlhiyucha maqsk'iniy saq kalakmakakal. ¹² Qayntaun yu machaqa' Kreta yu ixto'oyakan tacha profeta va naul: "Yu machaqan Kreta tamakanunun'alhiy, va tacha maqtalin yu ayajnan, va jama-lhaqnin, y ayaj lhuu tavajin." ¹³ Va laqsaval yu naul. Xlhiyucha laqatap'asta kalaqxa'alat'i ixlapanakni Jesucristo para ox kaval ixlhakapu'atk'an. ¹⁴ Ex chuncha jantucha katamakal kuenta yu vali'iy kuentos yu tamakay ni israelitas. Vachu jantu katamakal kuenta yu tanajun alati lapanakni yu tamakauntijlay yu laqsaval. Yu'uncha talhinajun tisuncha yu ox ali tisuncha yu jantu ox, mas jantu laqsaval.

¹⁵ Chavay yu talhit'ajun ox jatapastak'ati, yu'uncha tanajun tachun va laj'oxi. Pero yu jantu ox talakpastaknan y jantu talhakapu'an, yu'uncha tanajun jantu tu'uchun laj'oxi. Jantu ox kaval ixjatapastak'atk'an vachu jantu lay tamispay tisuncha yu ox, tisuncha yu jantu ox.

¹⁶ Tanajun tamispay ni Dios pero la ixputsukuk'an tasuy ni jantu laqsaval tamispay. Jantu ox laklha'ankan, jantu tato'oyanan, vachu jantu lay tamakay tu'uchun yu ox.

K'amalanin yu laqsaval

2 ¹ Tejkan uxint'i jamalaninin, maqsk'iniy ch'antaun kaval kun yu ox chivinti yu masukantacha. ² K'alakmalanit'i ni xapaynin para katalhistaklhi ixputsukuk'an para katati'ukxuntayal tacha lay kalakputo'oyakal. Ex ox katalhistaklhi ixjatapastak'atk'an, vachu' ox kaval ixlhakapu'atk'an kun ixjapaxkantik'an y katatayanil tejkan lhita'ay.

³ Vachu va chun ni xanatin maqsk'iniy katati'ukxuntayal tacha paxtoqniy ixlapanakni Dios, jantu katalaklkanal, jantu katata'ap'al. Maqsk'iniy katamasul yu ox la ixputsukuk'an. ⁴ Chuncha yu'uncha lay kalakmalanil yu jatsi'inka' xanatin para kata'achanil ixapayk'an y katapaxkal sas'at'ank'an. ⁵ Kalakmalanil katalhistaklhi ixputsukuk'an y jantu katalhitayal yu jantu ox la ixjatsukuntik'an, y ox katatapsal laqa chaqa' y kajamapayninil y katato'oyal ixapayk'an. Tejkan yu alati lapanakni chuncha katalaqt'sina', ex jantu lay katanaul ni jantu ox ixchivinti Dios.

⁶ Vachu va chun kalaqxa'alat'i yu ts'alanka' para katalhistaklhi ixputsukuk'an. ⁷ Tachun la mimpusuku kamak'at'i yu laj'oxi y chuncha lay katalaqt'si'in tacha maqsk'iniy kataputsukul. Tejkan malaniy ixchivinti Dios jantu kalhitayal yu jantu ox y jantu ka'ach'ajt'ay. ⁸ Ox kamak'at'i minchivinti para jantu lay katamuk'anin laqtaqal. Ex chuncha yu talaktanchaniyan katalhimanana', jantu lay kintalhikiltayan.

⁹ Kalakmalanit'i ni oqxtamatin para katato'oyal ix'ukxtink'an la ixlhitapatsk'an y para katamakal yu katalhipa'inil ix'ukxtink'an y jantu kataqaltayanal tejkan laklhijunkan lhita'apatsa. ¹⁰ Jantu kata'alhaunil, va katamakal para kalaklhi'aynk'al. Ex chuncha por tachun yu tamakay katalhimasul ni va la ox ni chivinti yu lhichiviniy Dios kiJamalaqtaxtunuk'an.

¹¹ Chavaycha Dios va masuta ixjamapayninti yu laqpumalaqtaxtuy tachun ni lapanakni. ¹² Kintamasuniyan ni kamakauntijlau yu jalaktu'unu' putsuku kun yu makaputunkan aniy lakamunukpa'. Vachu kintamasuniyan kalhistakvi kimpusukuk'an y ox kati'ukxuntayau tacha lhinajun Dios aniy lakamunukpa'. ¹³ Chavaycha pakxan'iyau yu kalhi'achantajuyau tejkan kun tachun ix'ayaxtu kintatasuniyan yu ay Dios kiJamalaqtaxtunuk'an Jesucristo.

¹⁴ Yucha maqxtaqkal ixmaqnika por kijnank'an para kintamalaqtaxtun la kintalaqalhink'an. Ex lay kintalaqla'oxinin ketsukuntik'an para ixlapanakni kajuu yu ayaj makaputunau yu laj'oxi.

¹⁵ Ex tachun ni anchanu, uxint'i maqsk'iniy k'amalanin. K'alakmalak'a'ulat'i ni lapanakni y k'alaqlhixa'alat'i kun mimpalhachimo'on. Jantu matichun k'a'akch'intaman.

Yu maqsk'iniy katamakal yu talhakapu'an

3 ¹ K'alakmap'ast'aknit'i ni lapanakni ni maqsk'iniy katato'oyal ni jalhachimo'onun ali yu talhit'ajun palhachimo'on. Va katamakal yu lhinauncan, va katapastak'alhil tacha lay katamakal yu la ox. ² Va jantu katalhimanul jalaklkanti matichun. Va laqalaj'ox katat'ati'ukxuntayal yu alati. Ayaj katato'oyanal y lakst'uniy katak'atsal kun yu alati lapanakni.

³ Kijnank'an vachu tontos ixjuntau, jantu ixto'oyayau, vamun ixmakayau yu ixmakaputunau ali yu ixkintalhipa'inin. Ixpu'ukxuyanau lhilukuj kun akcha'ati. Jantu ox ixkintalaqt'sinan y ixlaxkayyau. ⁴ Ex kintamasunin ixjamapayninti kun ixjapaxkanti ni Dios kiJamalaqtaxtunuk'an. ⁵ Yucha kintamalaqtaxtun por ixjamapayninti, jantu va por yu ox yu ixmakayau. Kintapumalaqtaxtun tejkan kintacha'anin kijatsukuntik'an. Chuncha tsukuchoqoo kun sast'i jatsukunti y kintamapaxan ni Espiritu Santo. ⁶ Ni Dios kintaxtaqni'ojon ni Espiritu Santo por yu makal

ni Jesucristo kiJamalaqtaxtunuk'an. ⁷ Ex chuncha ox kintalaqts'inan por ixjama-payninti para kalaqa'iu ni jatsukunti yu jantu aqtaun kami'oya'. Va yucha pakxan'iyau.

⁸ Yucha va laqsaval chivinti yu lay lhakapu'ankan. Ni yucha laqatap'asta k'alhich'ivin. Ex chuncha yu talhakapu'an Dios va katapastak'a' tacha lay katapu'ukxuntayal makanan yu laj'oxi. Ni anchanu chivinti va la ox y lay laq'aqtayjuy tachun ni lapanakni. ⁹ Jantu k'at'anut'i lakchivinti yu jantu aqtayjuy, vachu jantu k'at'anut'i yu lhichiviniy yu tatapasal ixpayank'an la maqancha. Vachu' jantu k'at'anut'i lakchivinti tejkan alin t'uy jatapastak'ati y talukujlata por yu najun ixlhachimo'on Moisés. Ni anchanu lakchivinti jantu tu'uchun aqtayjuy va jantu maqsk'iniy.

¹⁰ Incha ka'alil qayntaun yu jalakt'i-lhiy ni lapanakni para t'uy jatapastak'ati kaval ex kaxa'alat'i. Incha aaqtauncha makachoqoy ex kaxa'alach'o'o. Ex incha chuncha taylha'an jantucha kala'a'it'i.

¹¹ Va chuncha k'ap'uk'ats'aye'e ni jantu ox kaval ni anchanu lapanaki, va

maqtaqalhini'. Va x'aman muk'anikan ixlaqtaqal.

Ni Tito junkan ni katacha'ana' lapanakni

¹² Kakmalaqachaniyan Artemas o Tíkiko. Tejkan ancha kacha'ana', kama-k'at'i laqatap'asta para kilaqt'at'i laka putaulan Nikópolis. Va ikpastaktacha ni ancha kaktapasaya' laka lhik'asnin.

¹³ La ox k'alaq'aqt'ay'ut'i ni Zenas yu abogado ali ni Apolos la ixlakatink'an, k'alaqxt'aqniye'e tachun yu tamaqsk'iniy. ¹⁴ Kilapanaknik'an maqsk'iniy katalanil tacha lay katapu'ukxuntayal makanan yu laj'oxi para lay kalaq'aq-tayjul ni lapanakni kun yu tamaqsk'iniy. Ex chuncha kataxqanana' yu laj'ox la ixjatsukuntik'an.

Ni Pablo mastak'achoqoy ni Tito

¹⁵ Tachun yu kintat'a'alinta tamastak'ayan. K'alakmast'ak'at'i yu kinta'achaniyan yu ch'antaun kilhakapu'atk'an. Ni Dios katamapaynin mintachunk'an. Chuncha kavalcha.